

四庫全書

集部

欽定四庫全書

文忠集卷三十五

省齋文稿三十五

宋 周必大 撰

墓誌銘 墓表

朝請大夫知潼川府何君耕墓誌銘

淳熙十四年

公諱耕字道夫姓何氏世居漢州之綿竹縣曾大父杲
大父延世號休菴居士輕財好施食客日數十人與同
郡德陽史彬善以其子革為彬壻即公之父也贈朝請

大夫彬教授弟子以百數號絕學先生兩家既通婚姻何氏亦占籍德陽矣公甫勝衣從外祖學詞賦警敏異羣兒更授尚書殫思精義東西川名士張行成任慥繼為郡博士皆奇之方弱冠類試奏名第一時紹興十七年也自行在吳中蜀士不預廷試例賜魁進士及第命官視甲科第三講和後稍稍來奉大對時秦益公當國諭禮部尚書凡不至者第一等並賜進士出身今後準此入熟畫可遂為故事蓋自公始以左迪功郎充彭州

州學教授用舉主陞從政郎教授成都公天資高明積
學勤篤士間風四面至帥守監司交薦之改左宣教郎
領職如故制置使沈介轉運周綰何逢原皆中朝名勝
待公以異禮今上登極轉左奉議郎移成都府路轉運
司幹辦公事官長查籥負才易公公遇其施設未安必
反復告之籥大敬愛吏部尚書汪公應辰儒宗嚴許可
以文章典雅科薦公俄通判成都府乾道四年綿溪大
饑公沿帥檄賑濟過家率族黨發私廩為之倡里富人

獨閉糴公登門曉之弗聽械繫其家人遠近輸米相踵
全活不可計文人晁公邁為提點刑獄詩以美之會邛
蜀間盜發帥遣將將數百人命公督捕公宣示恩信譬
以禍福尋即解散擢知蜀州撫摩善良繩治姦猾郡以
大治盜復起隣邑州民驚擾公立木四門大書曰率衆
劫民財者斬有材夫攫鬻物於市者罪當流部使者欲
殺之且責公自說公曰前令為率衆而劫人者設今一
夫攫物耳非姑息此使者愧謝居頃之丁太宜人憂䟽

食三年出居僧舍自號恬菴躋叟以布裘鐵環竹杖等
五物為五友若無意於世者免喪踰年羗寇沉黎虞雍
公為宣撫使檄公守雅州諸司調西兵來戍公曰蠻敢
侵邊貪吏實啟之其患不在外今多屯兵必損郡計脫
不滿意且內訌是腹心之疾也守誠潔已奉公戒城寨
官無黷貨生事訓練州練優恤土丁蠻何足患其後八
年黎境再擾制置司調戍兵益衆將非其人果作亂人
服公先見知果州改嘉州課常為諸郡最除潼州府路

提點刑獄公事作諭民詩四十二篇語平易而教化寓焉郡邑家有其書強暴犯法父老必譙曰汝不讀何公詩乎往往知悔淳熙四年勅差監四川類試得士為多是歲被召明年入對論恢復四事且曰願陛下內定其志外修其具考其實無聽其虛言無畏難於今而成功於後日上曰卿所言盡之矣拜倉部員外郎改戶部郎中兼國史院編修官侍講東宮未幾遷國子司業就陞祭酒改太子侍讀講禮記終篇及史院進四朝志皆增

秩一等從秘書監外知漳州府請祠未報以十年六月乙卯卒於州之正寢享年五十有七既詔公主管玉局觀不及拜矣積官朝請大夫娶同郡李氏封宜人前公四年卒三男德方將仕郎德彥迪功郎新邛州司戶叅軍德固迪功郎新嘉州州學教授三女德秀德珍德蠲適進士王瓘闕鎔李兌孫男七人居安慶傳遷僧卿月早夭今存者曰惠雲法雲登雲即其年九月乙酉葬於縣之義合鄉元池里與李宜人同域而異藏公有集

百卷藏於家予未嘗至蜀而多識蜀士夙聞公有盛名
紹興末外舅王公葆守漢每道公之賢歲在戊戌予在
翰林而公實來一見如舊交已而僚於東宮於史院予
既知公公亦知予自公云亡懷思不已今德彥德固同
進士第泣請銘公墓義不得辭竊嘗評公於書無不讀
而得其要於文無不能而根諸理立朝端諒敢言典郡
豈弟人不忍欺其持心雖厚而臨事剛不可奪其造行
甚謹至適性亦通而不拘當仕則仕當止則止惟其時

而已矣始蜀先進久欲扳公於朝公未嘗有所就虞公
秉政知公特深迄莫能致也趙沂公入相薦公為郎公
積閱雖高然寄祿未至大夫為中郎滿歲乃可任子素
友愛季弟憐其早世撫孤德崇過已子將命以官於是
翻然而起至則忠嘉合上意譽望動縉紳朝廷進退蜀
士多以公言為輕重學省蓬山極道德文章之選公俱
為之長視禁途跬步可登一旦悼亡浩然有歸志日夜
求去人爭欲留公予時為承轄諒公誠慤莫敢遏也益

公之行誼文學出處去就大略慕唐白樂天而耽玩釋氏躬持齋戒尤與之同嗚呼斯亦賢矣是宜銘銘曰

珪璧其德

松筠其節

何以文之

惟學與識

宜公宜卿

我則自抑

宜耄宜期

天曷爾嗇

寧非劬躬

以壽奕葉

邈乎來今

尚考斯刻

段元愷墓誌銘

紹熙二年秋

段氏自唐成式刺吉州後家永新至諱準者徙居郡城

故為廬陵人準生居簡居簡生世臣族系駸蕃兄弟繼
登科號稱儒家世臣生子冲字謙叔一土南宮不肯為
新學退築芸齋藏書數萬卷朝夕讐校自號潜叟郡以
遺逸八行薦不就政和中太守程祈學有淵源尤工詩
在郡六年日與謙叔唱酬其和梅花輾轉千韻人嘆其
博所著書號螺川集多至百卷程為前序資政忠簡胡
公作後序是生五子君次居三名元愷字達信儀表偉
岸襟度坦夷始從進士舉值兵亂棄去輕財周急鄉里

仁之遇有持論不公行已弗正者輒面折不少恕人更服其義忠簡公與謙叔有師友婚姻之契待君甚厚每觴詠必連旬暨予卜居城東與君為隣君長予二十五歲而精神非予所及獨慕品酒量均劣可相追隨淳熙二年正月予赴行在所君來宿舟中飲奕達旦而別五年夏予在玉堂猶得其書是秋乃聞君以七月十一日卒享年七十有八後二年十月丁酉葬本縣儒行鄉橘井之原妻劉氏前卒瑩相望也二子人傑世其家人鑑

為季父鏐後孫男六人希尹希晏希說希周希顏希韓
孫女三人長適歐陽興祖次適劉慶遠一尚幼初君疾
革語其子曰胡公知我深今居里中必有詩文哀我銘
則屬諸內相小子志之既沒其子以遺命告雖諾未暇
迨一星終予奉祠歸人傑泣申前請乃為之銘曰

惟利與名

逐逐營營

外物重焉

在已必輕

孰如達信

樂以全生

尚論潛德

庶幾天民

提轄文思院葉君楠墓誌銘

紹熙三年

君諱楠字元質其先合肥人慶歷中徙家池之貴池曾祖亶祖茂父蒼贈宣教郎母吳氏繼母程氏皆贈安人君力學早成登隆興元年進士第調鄱陽尉夏旱繼以秋澇君請盡蠲田租守難之君言境內蕩屋廬者七百餘家溺死百八十人流徙相望盜賊將起欲惜費得乎守悔悟減租十九江州軍帥苗定御下過寬士卒六七輩掠君所部君檄取數四不報君引古誼質責竟正其

罪以繼母憂去官服闋注岳陽軍節度推官未上又丁
父憂終喪授邵州司法叅軍用舉者陞從政郎封州州
學教授地苦瘡癘三歲郡官死四十餘人君悉力調護
其家割俸助之淳熙十年改宣教郎知徽州績溪縣縣
統十鄉里正苦差役追擾君與約日受二鄉文書八鄉
得番休力役不疲官事亦辦人以為便爭欲及君時充
役其催科尤不擾民共樂輸惟恐後訟牒日省君乃斥
添給不受積至千五百緡大葺縣學買監書二千七百

餘卷市良田三十六畝士民歌曰前有黃門後有葉君
蓋蘓文定公嘗宰此邑也十五年轉奉議郎明年覃恩
轉承議郎賜服緋魚諸司疏治狀有旨任滿審察上初
政首用君提轄文思院命下一日卒於旅邸十六年六
月三十日也績溪士民間訃嗟泣享年五十二是歲十
一月十六日葬青陽溪縣北七里豐林之原娶汪氏封
孺人子之真女尚幼君篤實勤敏臨事慷慨數上書論
天下事皆考證古今別白利害從政務行其言未嘗苟

且平生喜著述有知非集五十卷精金訓鑒二十卷童
蒙記十卷始乾道丁亥九月予舟過池陽庚寅與客騎
遊九華道由鐵券山中有華屋四山環合是君家君之
父置酒留宿見二子焉長即君也方待鄱陽闕明日與
予並轡至青陽又明日出郭西南行登雙練亭觀雙瀑
至上下雪潭宿協濟廟溪聲如大雨予與客踏石涉水
為戲獨君魁梧遂墜水中衆客大笑又明日登化城峯
謁金地藏塔訪龍女泉李太白書堂蓋九華最高處也

東下數里上龜山尤險峻君忘其勞褰裳相從詰朝由
慕善鎮入五溪旁距鐵券纔數里乃別去自是無歲不
相聞庚子夏予與華亭錢公師魏同在政府師魏常分
教於池與君善共議拔君君徑從吏部調官封川予二
人既憐君遠宦又默嘉其恬於進取而愧不果薦進也
已而部使者爭舉君改秩又明揚績溪之政有列於朝
且用矣孰謂綬未結而纘已屬悲夫君之季綦繼登科
第狀君行實求予為銘予雖諾而未暇其嗣子不遠千

里訪予長沙垂涕固請何敢以老諄辭乃為銘曰

淳淳者車安行九折之途而僨乎四達之衢吾不知其何如尚鍾美於遺孤以增光於厥初

朝散郎致仕郭公彌約墓表

淳熙戊戌七月甲午廬陵郭公卒於其子興國太守份之官舍越明年冬十月己酉葬於吉水縣留田之原同郡新廣東常平使者楊公萬里狀其行實敬授鄉先生端明殿學士澹菴胡公胡公為作銘傳信無窮興國曰

銘納諸竈懼無以表於阡乃劉石為方趺圭首走介入
都屬某以辭追念往歲扁舟過公於梅溪其地在臨江
軍新淦南一百二十里亂山環合中時平行公始卜築
氣象殊軒豁別創佚我亭為燕息之所屢求予作記予
懶且病閱十四年未能成今公既沒若遂無一言是忘
昔人掛劍之義矣其可乎惟公才甚高學甚勤志甚大
惜命之不副方少時讀書為文已卓然不羣意富貴可
唾手取既齟齬無以自發則畫兵機數十策往說岳將

軍將軍奇之奏以官歷三任咸有績可紀已而歎曰徒勞耳掛衣冠而去是時興國已用家學第進士皆被堂選仕於四方欣然就養歸則教督諸孫以餘力稍從事田園然不求富也歲時釀酒烹羔與里父老游人有緩急輒急赴之往來廬陵臨江兩郡間不可得而親踈士大夫甚貴重之興國既擢任二千石諸孫雋邁力學嘗再舉於鄉公亦連值慶典數進文階佩服煒煌福與祿俱年八十有二乃卒嗚呼如公尚復奚憾而予猶云云

者蓋公平生刻苦專精凡六經諸史下至天文地理無不究其指趣而又天資敏明遇事不苟博極世務識高而慮遠大欲為國家立功名垂竹帛其小猶將撥繁治劇行志於州縣二者適不遂故以仕學遺後人而身享壽考康熙之福較其得失雖未易輕重然天之生才常艱幸而有人乃徒善其身及其子孫而無以施諸人識者莫不太息則予謂之命不副者可不可也故表而出之以告後之君子公諱彌約字景聞其世閥爵里言行

出處二公書之詳矣淳熙六年十月十日大中大夫試
禮部尚書兼翰林學士兼侍讀兼太子詹事兼修國史
管城縣開國伯食邑八百戶周某述

籍溪胡先生憲墓表

先生姓胡氏名憲字原仲崇安人紹興庚辰與某同為
秘書正字原仲年長過倍予敬而親之原仲尤相愛每
同舍退往往留語竟日原仲自言少從其從叔文定公
傳論語學時時為予誦說以為入道之要也明年原仲

上書論事求去天子待之良厚縉紳皆榮其歸官長玉山汪公聖錫合館職七人置酒道山堂以先生早賦歸去來之句分韻餞別又明年而原仲沒今蓋一世矣其孫親仁遠來長沙出門人秘閣修撰朱元晦所作行狀求表其墓凡其家世出處問學本末元晦紀次有法行遠無疑若夫懷思舊好尚論師友以慰夫慈孫之心則亦不得而默也自堯舜禹湯文武周公以道相傳見諸行事所謂師弟子之說固不必論惟孔子至聖有作無

時無位折衷六藝授之門人固嘗自謂文不在茲乎而
終有天喪予之歎者以顏子既死曾子晚方傳道其餘
則所得未深其器未大也馴至戰國異端浸起獨孟子
能因師說僅續不傳之緒然諸子百家已復並行道術
自是分裂至秦遂一掃而空之漢興諸儒稍習六藝之
文而不知明聖人之道專門名家互相矛盾道德性命
之理仁義禮樂之具視之蔑如又其久也雖訓詁章句
猶且前無所承後無所授況其上者乎韓退之晚出於

唐頗以師道自任終亦莫能救也天啟聖朝世與道興
上而元臣大老信此道以覺斯民下而老師宿儒進此
道以覺後覺然後人知聖賢事業本非空言間有操持
或謬趨向或僻者相與辭而闢之縱未能盡得周孔之
傳其視歷代從事末流失其指歸者固已不同乖離千
歲庶幾復合茲非師友淵源之效與方其盛時伊川程
公正叔之門從學者衆上蔡謝良佐顯道最為高弟以
其所得授之文定公康侯而涪陵譙定夫授易學於程

氏者原仲既傳其家學復往問易於譙譙謂其學有不
可以言傳特為原仲稍發其端原仲因誦所聞譙弗許
曰心為物漬則不能有所見惟學及乃可明耳原仲退
而求之久乃有得喟然歎曰所謂學者克己功夫也由
是自信不疑篤志力行以至於老中間可仕則仕必行
其道可止則止必致其義近而一鄉遠而四方皆師尊
之於是元晦以先大夫之命事原仲如父既盡得其言
行之美而又日進焉今遂為世儒宗豈無所自而然哉

顧予何足以知之姑述見聞附元晦所書之後使親仁
歸併刻之以告來者年月日具位周某書

文忠集卷三十五

欽定四庫全書

文忠集卷三十六

省齋文稿三十六

宋 周必大 撰

墓誌銘

伯母安人尚氏墓誌銘

夫人姓尚氏世為相州安陽人故金吾衛上將軍從諫之曾孫大中大夫棐之孫朝請大夫直龍圖閣佐均之息女也生而淑慧長而柔閑族黨異之龍圖公以碩德

鉅儒徧儀清綴崇觀典禮皆所是正夫人組紉之暇侍
立左右緒今閱古間有裨益既及并龍圖公方為少司
成妙選儒流將作之合謂我伯父辰陽府君諱利見文
學行義蜚聲上庠故以歸焉周氏為鄭鉅族於時曾大
父中奉大父大中皆無恙內外百口婦道為難夫人事
上以孝待敵以禮接下以和無間言者初祖塋之側有
腴田焉其生將售之大中欲謀而未有力夫人適大歸
密聞其議啟伯父曰吾奩具可出也近墳之地顧可使

他姓得耶伯父以告大中大悅其田遂歸於我靖康間
從伯父守官陝服虜騎夜至盡捐家貲獨取伯父所好
文籍筆硯使婢挾之以逃亂定伯父見而喜曰吾獨念
此君幸全之他不足計也由是益重其賢伯父之為辰
州有大姓以私匿亡命抵獄僚吏讞欲殺之伯父歸而
疑其故夫人曰官有常法疑則從輕可也伯父之意遂
定其人以全嘗晝游郡園道遺首飾厥直數萬求之不
獲伯父御下數嚴一府震懼夫人戒左右使勿敢言俄

得其盜則既分毀之矣乃使子弟慰諭而遣之伯父平昔宦遊勤於官政未嘗問及私事夫人以身任責故伯父得行其志粵自南渡遭家多難遺孤滿目伯父收集教育俸入或不給夫人以約為盈憐撫備至凡出入吾家者莫能辨其子姓戚疎也辛未春伯父即世於虔也貧無甌石夫人殊不介念而益勵子姪以學使無忘前人之志家有故笏蓋曾高時物其後繼世擢第轉以相授今年秋虔卒內訌蒼皇出奔身外無復一物及門夫

人獨悵然曰古笏不可棄也亟命健者反取之以行其
識度類如此俄以疾終於廬陵紹興壬申十一月癸丑
也享年五十有五嗚呼伯父之喪縗斬未除而天不慙
遺仍降大禍為善之報無所憑矣夫人慈惠有容待人
一以誠信化行閭內下不忍欺教督諸女俾熟於詩禮
咸謹婦道姻戚儀之初以伯父陞朝啟封孺人再命為
安人生四男必達必端必正必先四女長適右從政郎
呂坦中次適右迪功郎李延世二早亡適李氏者亦亡

矣孫男一人曰繹孫女三人諸子卜以是歲十二月甲申日舉夫人之柩祔葬於吉州廬陵縣膏澤鄉金鳳山伯父之塋永惟夫人之淑德懿行當求巨筆勒銘幽窆以襄事之逼也故諸兄命某誌之夫詞主乎信則無飾情極乎哀則無文勉竭肺肝紀實而已銘曰

猗與夫人

女子之師

來嬪大家

婦順母慈

始終於仁

宜燕其晚

胡戾於天

而報之簡

凡我族屬

洎厥後昆

煢煢失恃

誰拊誰存

涉江而東

有崇其岡

伯父是卜

龜猶告臧

歷吉撰良

言歸茲宮

銘分止此

哀則無窮

先夫人王氏墓誌

乾道二年

先夫人姓王氏由高祖階州太守諱亮而上世家博陸
至曾祖左金吾衛將軍諱察始葬安陽祖思州太守贈
少師諱復考給事中贈少保諱靚又開國焉遂爲安陽

人妣衛國夫人宋氏先夫人幼善女工通經史博知古
今事不自以為能而孝友柔順是專間遇親疾皇皇戚
戚竭力盡志惟人事之窮聞古有祈天代死刲體和藥
者皆屢為之以是父母尤鍾愛年十七遴擇所歸曾先
太學博士府君魁釋褐多士有大名遂歸焉未一星終
先君即世先夫人奉大母碩人居吉於是伯姊生十年
某甫四歲亡弟歲末周遭世多艱敵驚盜剽轉徙乏食
課婢採橡實蔬苗供養大母次給尊幼必均寧已之餒

如是者連月初外氏世顯仕衛國又丞相元憲公孫丞相龐莊敏公甥先夫人少習長試富貴事也一旦驟履艱窘雖寡人子不能堪處之熙然聞者以為難平居識慮高遠有大庇宗族姻戚之志而不克遂然隨事周急人已懷之紹興丙辰衛國道廬陵大母命先夫人歸寧遂偕行寓信州時某齒少長矣先夫人躬督誦書至夜分未辨色則以杖警於榻使卧而覆之又教以屬對賦詩已而曰舉業非吾習也為擇汴人陳先生特使從之

先生弟子以百數先夫人一衣之華一味之甘輒命某奉焉先生歎曰有母如此吾忍負之故教某甚切其不能有所成者某質凡也不幸明年衛國病先夫人省視藥餌廢寢與食躬難能之孝有加於昔既薨晝夜號慕至累日水漿不入口人固憂其毀而某冥頑悖戾不能解釋調護如先夫人所以事父母者萬分一竟以戊午歲正月十八日不起會疆事未平亟以二月十六日就塋州北之茶山壽止三十七後某為秘書省正字遇沛

澤贈孺人忝御史再贈安人五男女伯姊適右宣教郎
賜緋魚袋尚大仲婦順母儀其來有自吾兄平叟不及
名吾弟必強有雋才再預鄉薦年三十三而死吾妹吉
孫亦早夭孫一人綸惟周氏再世卜葬廬陵縣膏澤鄉
金鳳山先君諸父以序陪列獨先夫人塋他邦遐想松
檟魂飛心折隆興元年某賴夙訓蒙上恩入侍延和殿
頓首自言願假外祠以畢遷奉詔可之歸與姊謀會姊
病未果乾道二年三月姊又卒孤立自悼益懼溘先朝

露弗遂厥志乃以十月如上饒十一月庚戌啟土翼日
護柩以行十二月壬申達於吉顧視先塋兆域相邇不
可以祔別卜地於夾河二里間惟長岡之麓食鄉猶膏
澤也庚寅甫窆丁酉窆嗚呼我先夫人孝於親不獲其
報艱厥躬弗償以壽裕乃志弗究其成十年教子而不
及享一日之養天不可問理不可詰將由某為禍為逆
天罰崇降而底是耶承祀任重不敢殞滅願以未死之
年長守邱墓九原之心庶少慰乎以襄事之迫未能求

當世名卿紀述潛懿姑用不孝之辭誌遷改歲月云孤
哀子左承議郎主管台州崇道觀某泣書

亡姊尚氏夫人墓誌

乾道二年

乾道二年三月己巳伯姊以疾不起於尚氏之寢越六
月甲申將葬於吉州廬陵縣膏澤鄉珠禾之原嗚呼昔
我先君先夫人皆以惇實慈孝不獲下壽而亡弟子柔
雋明傑出又中道而夭獨吾姊肖美鍾粹克備衆德是
必享有耆福為世矩範而天命不延壽止於四十有七

名不列於命婦之籍淑質懿行奄忽以沒嗚呼某尚忍言之周氏世家鄭夫人曾祖中大夫諱衍祖左大中大夫諱詵父朝請郎太學博士諱利建妣安人王氏惟吾家與安陽尚氏舊為婚姻故夫人年十有六歸今右宣教郎前知贛州寧都縣賜緋魚袋大伸實政和國子祭酒佐均之婦天性敏悟知書達物理嫁時雖少已能代姑主壺政御下有法度接物極和易與人言惟恐傷之及臨事果斷不惑凜然有烈丈夫之風處大利害略不

動聲色平居言弗妄發至論事成否語逆順莫不中理
間有請問舊事則雖未亂時耳目所經歷者細大畢記
其道上市流風遺俗本末曲折使人聽之灑然凡與寧
都遊者往往周知其宗族出處分別淑慝至於慶弔交
際其使薄厚中節初莫見其頤指之勞寧都仕官不偶
生事屢空然僦儻喜賓客樂施與家之有無不暇問也
夫人節其豐儉彌縫調護人莫能測平居將順親切兩
得其宜待人無戚踈一以恩意性尤孝友每及父母世

輒流涕篋有杯棬手澤寶藏數十年無一毫遺墜其哭
子柔也哀動隣里自年三十八九得痼疾每發輒劇而
經紀家事不廢精神言語泰然不以為憂顧常勉夫以
治生進諸子以學庶幾蒙其成佚其老不幸未就而病
棘矣嗚呼其命也夫男五人璆璵珪一早天一未名也
女三人長適左迪功郎田稼次許武岡守羅公之子尚
賢季尚幼孫女一人噫夫人之賢行多矣今不能盡著
獨紀其大略如此後世其有考焉某孤苦餘生自紹興

癸酉與姊別歷十一年而以罪去朝始得朝夕省視纔三年而遂為之誌嗚呼其尚忍言之

靖州推官張廷傑妻李夫人墓誌銘

紹興三十一年

紹興二十九年八月甲寅前靖州軍事推官張君廷傑喪其夫人葬有日使者以狀來請銘某以不文辭推官復書曰士大夫或出或處其行誼才猷皆可表見於世至於婦人女子其處也以組紉婉婉為能已嫁則奉尊嫜勤盥饋耳隱德懿行微姻黨有所不知子毋庸辭某

因念歲丙子過推官於里第置酒相勞苦時夫人迎母
宜人胡氏在席老且病奉養為難夫人左右承顏愉愉
融融既退則涕數行下若有甚憂者予問推官夫人方
喜而悲何也推官曰是新喪介弟而母未之知喜以悅
親悲則傷其弟也因為予言夫人歸我纔閱月父母赴
官江右朝夕憂念遇心疾者歲餘其後父卒哀毀骨立
他日聞誦孝經喪親章輒慟哭愛弟甥尤切有不幸者
追悼至忘食事蓋孝友如此以予所見叅其所聞賢哉

夫人賢哉夫人今既銘其墓不敢隱亦不敢誣按夫人
姓李氏世家平江處士應之曾孫贈右通議大夫雅之
孫而左朝請大夫通判廣德軍寬之孟女也天資簡靜
少長如一通判君以才學起家仕於四方為夫人擇佳
對以推官鄉里盛族方游場屋故歸焉時甫踰笄雖不
逮事舅姑而承尊撫卑適其戚疎人無間言女叔在室
者三夫人禮遇勉飭相繼為名人婦當是時平江張氏
義聲聞淞河以西繫夫人之助推官宦遊不遂築室治

園圃日從賓客遊而中外冠婚饋問慶弔無虛月夫人
悉力相之不以累其夫也蓋約於奉已而泰於賙急誠
以御下而勤以訓子故宗族之窮困者多蒙其惠而長
子未冠已哀然薦於鄉先鳴於上庠里閭榮之晚事母
愈孝謹調旨甘窮澣濯間於溫清則讀釋氏書平時語
默有常度閨門肅如也居無何胡宜人卒夫人號慕致
疾稍瘳而復作病棘不他及內勉夫以教子外則以葬
母囑其弟而已享年五十生三男聖任聖清聖和三女

左從政郎新揚州錄事叅軍蔡瑤左迪功郎新湖州安吉縣主簿李安上左從事郎孟并其壻也仲女先女先夫人二十八日而天季未行孫男三人鎬鎮鏃葬用三十年二月壬申其地在吳縣長洲鄉華山天池塢與通判君墓相望也九原有知夫人其奚憾銘曰

士之百行 惟孝為始 女子有行

鮮克舉此 溫溫夫人 允有全美

而其愛親 性實天畀 生也色養

沒也哀毀 嗚呼夫人 可謂孝矣

我銘幽宮 惟是之紀 庶幾無窮

以勤為子

曾監酒母孺人劉氏墓誌銘

淳熙二年

分宜宰謝君諤狀右文林郎曾君光庭之夫人劉氏遺
事累千五百言以授夫人之子敏學敏學復屬某以銘
予謂分宜文贍事核益之贅矣敏學曰詳在行實要在
銘章古也固請不已會敏學死予悲其意乃序而銘之

劉氏本長沙人後徙臨江軍之新淦縣夫人曾祖德誠
祖如新父義義有隱德嘗辭遺逸之薦者賢其息女以
歸文林惟夫人幼服姆訓長閑婦道事舅姑孝待宗族
敬内外交譽間言弗聞文林官湘中當靖康之難率零
陵民兵勤王夫人力修閭政日以詩書課其子姑嚴夫
人留鄉里寇攘梗道數走介間關問安使文林悉力公
家不貽親憂比七年歸奉盟饋於堂上男愿女柔濟濟
列侍嚴夫人喜曰賢哉婦興吾曾氏矣文林既倦遊築

大第桂峯之下別開槐堂招致游士又以餘力治園圃
燕親賓間遇歲歉賑廩平價大庇一方夫人實相之文
林益益勵諸子以學問某賢也可師某能也可友必厚
禮重幣延置家塾嘗曰蓄田千畝不如藏書一束故不
吝金帛以求之插架幾萬軸子孫聞見駸廣藝業日有
聞對策集英者三貢於鄉者十二文風藹如也紹興已
卯慈寧太后慶壽八十有詔子為貢士得封其父母之
高年者於是有孺人之命後遇郊恩加賜冠帔年九十

三以乾道七年七月二十四日卒是歲十二月丙午葬
吉州吉水縣仁壽鄉萬安里西岡之原夫人五子長右
修職郎饒州德興尉敏遜次鄉貢進士敏修次敏德次
迪功郎監隆興府豐城縣戶部贍軍酒庫即求銘者次
敏行一女適鄉貢進士毛穎士孫男十五人三益三錫
三復三省三畏三聘三覲三壽三登三接三顧三異三
協三英三達預貢者三益三省三畏而三復三聘相繼
擢第今為德安隆興二府教授惟三益早死餘皆力學

女八人曾孫男九人宏圖宏度宏議宏規宏基宏模宏
寄宏舉宏量女亦九人夫人天性勤儉既以自勉亦以
誨人御下慈和念勞而忘過家浸隆盛不矜不驕年登
耄期未嘗益醫孫曾滿前日娛其老世所願欲一無憾
焉嗟乎壽富康寧好德考終能備者鮮矣而況脂田命
服寵光鼎來孝子順孫祿養踵至古稱五福今乃七之
是宜勒銘以信來裔銘曰

維德戎戎

維報芄芄

綿延厥家

寧止我躬

鬱其西岡

宜松與栢

奕世不凋

視此柯葉

王給事母安人徐氏墓誌銘

淳熙三年

淳熙丙申立春氣應皇帝慶太上皇壽於德壽宮大赦
天下文武陞朝官並許加封父母中外蒙恩者不可計
獨計臺省寺監職事官不啻乎百人其及親者纔二十
有三而軍器少監兼考功郎官王君之母太安人徐氏
在焉命書既下合監之僚屬暨六曹同舍郎皆踵門賀

退而咨嗟歎息咸謂婦人能教子以儒術起家者固少而有子入為王官者加少若乃國家非常之慶絲綸再命之寵是又千載而一遇者非積善在躬享有多福曷至是哉嗚呼可謂榮也已矣居久之太安人疾作少監請於朝願假使者節若太守章出便醫藥天子與大臣嘉少監在考功能以精明澄四選強毅任衆怨方顯用之不聽也已而太安人竟卒於是前日之客復弔少監於廬予亦至焉少監杖而泣曰吾母之賢朝士舉知之

子久以文知我顧不知吾母乎願以銘為托他日遂以
其鄉人將作少監兼吏部郎官吳君飛英之狀來則序
而銘之徐氏世家處州之青田太安人曾祖新祖崇父
順年二十二嫁同郡王公長方逮事舅姑以孝謹聞王
公故貧與二弟大方義方俱嗜學自太安人來歸家事
日理不以衣食累其心而專於書故大方登博學宏詞
科義方亦有聲上庠起家永福尉獨公困躋不偶與太
安人日夜教子及見其登進士第中學官選而沒後贈

右承事郎太安人慈祥勤儉綽有容德待娣姒以誠御婢妾以恩少監每與客語輒耳屬於屏既歸枚數曰某賢可與游某不然勿親也後多如言蓋從其子官於朝者五年劬躬擇隣迄獲豐報初以乾道九年冬祀恩封太孺人至是蓋進封云其卒實三年四月十六日享年六十有九是歲十二月甲申葬於麗水縣靈隱山承事公之側生三男信即少監也价嘗興國學薦偁早世一女適進士何京孫三人一男二女銘曰

光輝為陽

晦藏者陰

婉婉女士

難乎邦聞

猗與夫人

克艱於始

祿不從夫

幸哉有子

子也多才

夫人成之

國有大慶

夫人膺之

遂都榮名

人以譽歎

歸安斯邱

永矣奚憾

程給事母宜人胡氏墓誌銘

淳熙間年

宜人胡氏故朝散大夫致仕程公晉之之室今給事中

叔達母也徽州黟縣人其先有名育者仕晉為新安太守因以占籍其後名星為蕭梁太常卿既沒而廟食族系日以蕃宜人曾祖德勤祖義璇俱隱跡弗耀父獻卿好賢樂善一鄉稱長者生五女尤憐愛宜人謂必為名婦聞大夫早有賢譽故以歸焉程氏衣冠蟬聯與胡氏世通婚姻大夫祖母太碩人世母咸寧郡夫人母太孺人皆宜人近屬也始嫁翁姑高嚴娣姒如雲宜人恪共盟饋勤劬賓祭承上接下動有法度中經亂離褚筭一

空約身縮用助大夫經理家事秋毫無妄費至資其子
宦學四方則畧無所靳給事以是少年登進士第解褐
歸拜重親里閭洛美翺翔仕路風節議論日益有聞入
佐天府大夫宜人年皆七十餘休沐必娛侍西湖上間
登天竺諸山諸孫先後扶攜二老人輒却之曰吾方健
汝毋憂居亡何長子叔向季子叔豹相繼死宜人始忽
忽不樂頗苦微恙給事遂求守通州以便養未行擢登
御史府進左司諫數請外上固留之宜人亦曰吾念二

子耳汝之去留吾何擇焉悉心報主所以慰我心也給
事乃不敢言明年宜人竟不起實乾道元年八月二十
九日壽七十有五後十四年而大夫卒宜人生三子給
事其仲也二女嫁任允迪黃銓孫男九人鑄鎔鎬早世
鉉從政郎湖北路安撫司幹辦公事錫從事郎婺州荆
蘭溪縣主簿鉅鉞鎮未仕孫女十一人曾孫男五人鎮
孫子八未名寧孫子六重一早夭宜人初葬縣之長遙
山大夫以其地下濕別卜地於北山亭古城培之原淳

熙六年八月二十九日甲寅葬馬給事之為少尹也某
備官於朝一見如故知每聞宜人慈惠肅敬四德兼茂
知古今通釋氏書常敬仰其賢又聞翁媪偕老子孫方
昌怡怡愉愉百順具備未嘗不自恨不天不復有此樂
也踰一星終復與給事直禁林侍經幃僚承華情義款
密舉朝莫擬給事每云吾父滋老欲改葬吾母而未敢
他日尚屬子銘予敬諾已而給事以直龍圖閣奉祠歸
而大夫沒書求踐言其何可食銘曰

婉孌肅莊

以承尊嫜

儉勤淨方

以從其良

擇隣諸祉

又燾厥子

展如夫人

不曰賢矣

匪劬其躬

孰報之豐

謂或不信

盍觀初終

相彼新阡

有原膺膺

利其嗣人

以奠終古

孟媼墓記

佛書云汝未舉心塵勞先起學道者晝夜刮磨其去未

銖兩而其積已鈞斤矣所貴乎無心者以其此無患也
某之先夫人乳媪孟氏未嘗學道而能以無心處世故
憂樂不能移物我不能二而其一死也超然自在卓然
奇特有精練老僧不可及者此豈區區刮磨之力哉根
器異耳媪東平人父孟某母李氏以元豐年正月三日
生少嘗適人而其夫凡劣不可依李氏謝絕之攜媪來
吾外家乳先夫人方外家隆盛時金帛填委同輩皆厚
自殖媪視之蔑如也顧獨喜博負雖多懽然無吝容勝

亦散之未嘗有所貯積戊申巳酉歲江浙大亂吾家轉側兵火中而先君不幸後十年先夫人復謝世蓋多故矣人為媼戚戚媼自若也遇博輒抽簪質衣一笑為樂性淳直閤裕待人如我視我如人與童子言不異長者人有不直亦嫚罵弗恤其人愧服曰媼言是吾不怨至於事嫡以上與夫逢迎賓客則又執禮無違雍容可觀見者知故家遺俗自有體也伯父辰州府君御下嚴甚不假左右以色獨於媼加禮焉始媼年三十五已受戒

屏葦酒時時取佛書誦之亦不深泥名相笑歌嬉遊陶
然自樂如是者數十年當紹興壬申秋卧疾於贛會齊
述反某與亡弟子柔夜挾媪出城得舟下廬陵寓永和
鎮之本覺院其病浸劇盖踰時側身而逝十一月十三
日也年七十有闕時亂未定某亦大病幾死子柔遂以
茶毗法化媪薪盡頂骨如雪而舌不壞舍利綴屬無數
緇素駭歎惟媪性與道合豈以此為異然使不緣倉卒
擾攘之故具棺槨以葬則亦何自見此奇特哉後幾日

瘞其骨於水東金鳳山其處又後十一年某歸自臨安
始為立此立時子柔之沒已四年矣悲夫隆興元年七
月具位周某謹記

芸香誌

周子充之侍妾曰芸香姓孫氏錢塘人父德以其淳靜
謹畏精於女紅頗能為新聲事予於行在所時年十七
後二年從予歸廬陵明年六月一日病死為買地州南
二十里聖居山葬用七月十八日實乾道九年

文忠集卷三十六

欽定四庫全書

文忠集卷三十七

省齋文稿三十七

宋周必大撰

青詞 疏文 祝文 祭文 勸農文

皇后生辰三茅觀設醮青詞

淳熙十五年二月二十六日

氣淑春陽茲惟令序祥開月夢載紀誕期仰陰教之素
修鑿羣心而申祝肅裒羽士祇按瓊科伏願誠格穹蒼
慶流宮掖天作之合丕延有永之年邦孚於休共對無

疆之祚

潭州祈雨設醮青詞

紹熙三年閏月七日

政績繆戾至干陰陽之和物當發生乃愆雷雨之澤雖
嘗奔走於羣祀未敢瀆煩於上穹今春色已深農務正
急而陂池久涸田畝失耕若非致力於初何以責成於
後孰能為地惟可呼天伏望閔民無辜赦臣有罪擴乾
坤之鴻施釋黎庶之憂心三日為霖示有秋之嘉應多
龍則早破自昔之俚談

設醮青詞

乾道五年十二月十三日

閨門乖宣滯之宜莫施祝劑肺腑籲

闕

敬遵科式仰謝生成異真馭之下臨俾寸誠之上

闕徹

闕

永垂道

陰均庇寒門

夫人設醮青詞

淳熙九年正月七日

乾坤大德無物不生螻蟻微誠有求斯應俯循弱質每
困宿疴懼多積於悔尤思少伸於祈謝敬逢人日祇按

冲科延望碧霄虔輸丹悃願言四序之內永保安寧仍
俾一門之中同臻康泰誓圖報塞彌謹薰修

又 淳熙九年

三年疾恙曾藥石之弗離一意禱祇庶災屯之可弭屬
將更於歲律且密近於生朝祇按冲科肅延淨侶少効
蘋蘩之薦用伸螻蟻之忱伏願上帝垂慈列真降鑒宥
向來之罪戾錫此去之康寧惡曜或加賴天恩而轉喜
福基雖薄資聖力以增培永與家庭同承道蔭

設醮青詞

淳熙十年閏十一月望日

德輶智淺已慚位序之高命薄福輕復念年齡之晚屬
歲華之將易推星數之多虞火宇臨高強之宮日時晦
甲乙之位適因闕懇馴致痊平靜言不肖之愚氓何事
靡干於聰聰因其生育之日罄乃薰修之誠既謝前愆
亦徵後福仰祈福闕永保康寧

又

乾道九年六月七日

善惡繫於人為固當修省灾祥由乎天數亦許祈禳藐

是微生困於宿恙矧運氣之適併懼尤悔之相乘敬即
家庭仰干道蔭伏願真游降格鴻造恢施錫康寧於視
履之間均信順於閨門之內

又

淳熙四年五月七日

養生無術既乖寒燠之宜制命有常適值灾屯之會蓋
嘗推運限而懼星辰之下照亦復省才能而知祿位之
踰涯既未遂於退休合少伸於醺謝伏願寸誠昭格洪
造鑒觀貸已往之愆尤錫方來之康泰更均道蔭垂庇

寒門

佑聖觀夫人設醮青詞

淳熙六年十一月十一日

天雖難諶誠則易格伏念妾昨嬰疾恙深慮灾屯故當
呻吟默致懇禱旋臻藥喜頓釋隱憂荷高穹之至仁從
匹婦之微願今闕

仍邇新春用虔致於薰修庶預

伸於禳謝伏願列真降鑒丹悃潛通消來日之災屯錫
衰宗之庇蔭壽命延於兄弟康寧逮乎室家稽首投誠
傾心俟命

夫人設醮青詞

淳熙十一年四月

福善禍淫豈私於匹婦跼高踏厚當罄於一誠蠢爾微
生居然多病矧愆尤之常積宜災屯之是虞匪假薰修
孰伸禳謝伏願坤乾覆載仙聖鑒臨星躔易咎以為祥
運氣轉凶而逢吉俾闔門之康泰願永世以依歸

設醮青詞

淳熙十二年正月丙午

官崇而祿益厚未知稱塞之方福過則灾或生凜有憂
虞之象因歲華之載易適運氣之將交念多積於過愆

恐浸招於凶咎肅哀羽士祇按仙科庶假薰修少伸襁
謝伏願衷誠上達神鑒俯昭擴善貸之深仁憫孤懷之
多懼賜以公私之無惱俾其老幼之咸安誓矢惕厲之心
力報生成之造

夫人設醮青詞

淳熙十三年十月七日

惟疾之憂嘗攄丹悃勿藥有喜旋荷洪恩自非憑蓋高
蓋厚之仁何以篤惟子惟婦之慶既資幹蠱之裕且幸
弄孫之歡敬卜佳辰少償夙願伏望宵晨降嘏時序蠲

災錫老幼之康寧誓初終之歸向

遷右相府設醮青詞

淳熙十四年四月十五日

福善禍淫何私於覆幬避凶趨吉敢緩於祈禳言念微
生猥膺重任雖有效忠之志而無經遠之才甫即攸居
深虞曠職敬陳章醮祇叩天聰伏願誠悃上通祺祥下
集惟長少獲安於私室則勤勞可効於公家蠢蠢之愚
拳拳於是

設醮青詞

淳熙十五年八月十五日

謹疾無方值陰陽之大寇跼高有謹本家室之至情旋
臻藥石之功仰賴乾坤之施載涓吉旦祇詠靈篇修清
淨之勝緣償禱祀之素願仰祈洪造俯鑒微誠字在強
宮雖還闕而不害歲移飛限縱遇弱以無憂推是蔭庥
均於老稚

遷左相府設醮青詞

淳熙十六年三月十九日

小才何取偏儀輔弼之聯廣厦既遷彌積高明之懼甫
更月律思及誠心因元命之紀辰叩上真而籲懇伏願

博施造化兼利公私章厥俊民家有平康之望介茲景
福神惟正直之臨草芥雖微乾坤所鑒

遷入廬陵舊居前一日設醮青詞

淳熙十六年十一月丙午

從宦無功言歸有幸惟茲環堵僻在東城人或議其陸
沉臣竊安於幽屏將於詰旦爰即攸居值初度之日辰
按冲科之儀式念禍福之求由已愈當淑謹以禋身惟
災祥之降自天必賴神明之垂佑倘四序常臻於康泰
則一門永荷於生成

薦尚氏姊水陸文

乾道二年

姊弟同氣期畢世以相依死生異途悵終天之永隔欲
寫無窮之戚必資最勝之緣按梁武之舊儀演阿難之
遺教設衆香之鉢以屬饗萬口燃無盡之燈以遍照九
州庶幾凡聖之普霑可使自他之俱利伏願佛慈無碍
願力無邊消亡者塵塵劫劫之罪愆釋亡者世世生生
之冤業受天人之至樂慰手足之深悲

焚黃水陸疏文

乾道六年

薄命天窮莫奉過庭之訓湛恩日富屢頒告第之書適
生育之載臨念劬勞之缺報集寶坊之淨侶演焦面之
遺文薰修罔間於冥陽悃悞尚通於幽顯伏願承佛威
力受國寵榮永從極樂之遊少慰遺孤之望

廣教寺設供疏文

孝極事親每自憐其孤苦禮嚴上塚乃久困於飄流由
多生罪逆之至深故今世報緣之如此逮被漏泉之澤
益懷反哺之悲恭即寶坊虔修淨供追崇梵福雖人子

之至情升濟冥途亦遵師之本願仰惟慈愍俯為證知

判潭州謁宣聖文

紹興二年

欽承上恩付以民社居敬而行簡懋德以帥下古有明訓其敢不勉先聖先師實鑒臨之

謁諸廟文

忠信慈惠然後民安之靖共正直然後神聽之此某夙夜所當懋勉若夫順豐年迎時雨寧水旱弭災兵遠辜疾凡是數者非有相之道則罔攸濟視事伊始敢不告

虔

南嶽行宮祈晴文

紹熙三年十月一日

維皇降康眷是湖湘畝有餘糧農夫洋洋黍稷稻粱指
日積倉孰云肅霜而以雨妨顧瞻圃場惆悵徬徨吏治
弗臧惟知祈禳帝功夙彰曰暘則暘母令豐穰反虞災
傷齋心撰良祇薦令芳言錫之祥報敢怠遑

東明寺祈晴文

下民望歲欲多稼之豐登大士應緣隨衆生之祈禱瞻

言農畝幸底金穰乃當刈穫之時未息霖霖之雨人將
咨怨吏則憂惶茲仰叩於覺慈庶速回於霽景伏願運
神通力開方便門消散積陰現祥雲之紛郁破除諸暗
舒慧日之光明毋棄壞於全功永歸依於妙智

南嶽正廟再祈晴文

紹熙三年十月十三日

帝惠南土賜之金穰孰云既成窘以陰雨干和致沴由
政弗減三農何辜失此一稔禱祈雖應旋即沛然吏民
皇皇縛手無策欽惟嶽鎮大庇方維曰暘而暘易若反

掌豐凶之決莫急於斯開霽旬時庶其有濟投誠請命
必冀矜從

東明寺再祈晴文

比以連陰害於多稼備殫懇悃僅獲感通日方出而雲
遽凝土纔乾而雨復作致災之故端本吏愆壞物之成
決非天意敢辭屢瀆仰叩至仁惟賜之半月之晴則濟
此一年之事精誠已竭聰聰必孚

南嶽謝雪文

紹熙三年十二月

臣守茲土無術消沴春而謁雨秋而祈霽自冬徂臘雪未平地仰瀆於神亦云急矣帝奠南服有求輒遂曰雨以種曰暘以刈盈尺之祥又驅疾癘加惠斯民亦云至矣再拜於庭且謝且愧其卒相之以興嗣歲

南嶽行宮祈雨文

紹興四年

冬春之交無大雨雪候踰驚蟄農務方興田畝未濡陂池尚涸先事而慮豈惟有司稽首靈祠齋心致禱願恢貺施霈之甘霖以兆豐年其敢忘報

南嶽正廟祈雨文

臣守藩無狀沴氣干和乃自歲端雨不時若驚蟄而後
暖氣蚤來三春過半種未入土耕夫束手穡事可虞仰
止帝廷歸誠請命臣實有罪罰其敢逃民之無辜祈賜
矜憫願下膏澤庇茲一方呼吸之間霈以甘雨敢忘報
稱庸謝鴻恩

南嶽祈晴文

乃者芒種之前日臨甲子大雨傾注人胥憂疑自是以

來霽霽連夕下田甫種巨浸壞之其在目前固已甚懼
為霖既過後日或慳靜言思之益以惴恐更慚無術帝
力可回曰暘而暘所望甚切願留甘澤以濟後圖虔叩
行祠必祈響應敢忘飭勵仰稱慈憐

又

三時農務其成在冬帝眷南邦賜之屢豐是刈是春偶
未訖功窘此陰雨憂心中忉忉乃迎甲子請命於宮既惠
其初忍墜厥終霜風掃曠晴日麗空有祈必報其敢不

恭

南嶽行宮謝晴文

梅霖應候謁霽非時水溢下田為民僭瀆聖功響答祈
謝敢稽繼自於今五風十雨庶成稔歲併用禱祈

府治謝晴文

紹熙四年十一月十日

歲有饑穰帝司其權辛酉之夕風雨甚顛多稼云黃髮
爰於田顧瞻行宮逝將乞憐踐濕以往迎曦而還呼吸
之間成此豐年若民與吏拜賜欣然吉蠲為饎維以告

虔

改判隆興府辭宣聖文

紹熙四年十二月

某乃者親事之始祇見學宮居敬行簡懋德帥下有是
言矣三年之間雖愧允蹈亦弗敢諉也今蒙恩易鎮鄉
部於其將行不敢不告

辭諸廟文

紹熙四年十二月

某分鎮湘楚三閩嘉平髦髮之惠罔及於民邱山之賜
獨賴於神四鄙不聳百穀用成恩徙鄉部以為歸榮莫

知報德維以告行

祭勾芒神文

紹熙三年


青陽開動太皞御辰天地和同根荄發生爰出土牛以
告農耕祇薦醪羞徼福明神克相冬作以底西成

潭州勸農文

紹熙三年

紹熙三祀仲春既望遵奉詔令勸農於郊重湖以南地
廣人衆田畝高下有肥有磽欲致屢豐在勤四體東作
鹵莽西成亦然告爾農民深耕易耨用天之道隨其蚤

晚分地之利成其膏腴修爾陂塘旱乾有備晝以溝洫
水溢何憂毋事惰遊以妨本業毋興鬪訟以致污萊父
勸其子兄勸其弟共期富庶咸聽毋忽



文忠集卷三十七

欽定四庫全書

集部

文忠集卷三十八

詳校官庶吉士_臣李傳熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣于希賢

欽定四庫全書

文忠集卷三十八

省齋文稿三十八

宋 周必大 撰

祭文

同兩倅師屬祭吳漕之母徐淑人文

嗟惟淑人嬪於大家早慶三遷之効晚綏五福之遐儼
孫曾今在列梁絲綸兮屢加惟為善之獲報信天道之
無差憶四月之維夏瞻版輿而歎嘉曾晦朔之幾何易

繡衣以衰麻雖榮養之無憾終人生之有涯旅官僚而薦酒聊以慰夫皇華

祭宋待制文

紹興三十二年二月

惟公以絕人之才膺衆賢之報年甫四十固已遊供奉之班總六路之漕矣於斯時也雄鉅利刃人皆知之而孤忠膽智猶闇然其未暴也迨靖康之初元駭羣小之媚竈掩慈孝於兩宮紛是非而顛倒微公篤志於君親竭誠於傳導則輔國之謀遂成而梁冀之賞可冒矣嗟

時事之天知謂豈弟之神勞奚多言之不宥曾未弭乎
憎好明明元后日臨天燾因永念夫先烈爰追揚於特
操復邇聯於邃清加異數於耆耄想精神之折衝竚謀
猷之入告胡厭薄於斯世乃歸全而高蹈藐一介之彌
甥憶崇墉之屢造從容乎贛水之上欵密乎鍾陵之輿
示元憲之遺書期妄庸以遠到恍十年其一夢倏終天
之是悼寓寸誠於豆觴寫至哀於誄禱惟令名其闕
則參稽乎手誥可也

祭許寶文文

紹興三十二年五月

惟公天與俊傑心潛藝文才具之敏工師運斤學殖之
豐農夫力耘來遊帝郊簪笏玄纁中臺有蘭西崑有芸
是握是拂英聲日間皇曰試之牧民馭軍於虔於桂除
荒靖氛內閣進直旌能第勲屬時艱難毀譽糾紛或廢
或興有猶有薰公心淡然不為戚欣晚以几杖歸安鄉
枌年則耄矣色猶閭閻辯有鋒出慮無絲棼百年雖長
既晨必矐死生在公夫何足云惟昔王父得公樂羣成

均之鼓共警朝昏元符擢第並揚清芬交情孔密壽殀
中分惇惇不肖寓賴之漬公以耆舊來為邦君輩行雖
絕誨憐則勤時置賓筵笑歌紛紜一別十年萬事浮雲
歿不拊棺葬不即墳言念疇昔憂心載焚漬酒以絮實
登以芹寓詞叙哀雪涕霽霽

祭子柔弟文

維紹興三十二年歲次壬午七月丙申朔二十四日己
未兄具位周某謹以清酌之奠告於亡弟子柔十解元

之柩昔吾弟之病革命火化而投諸清泠之淵我知之
矣慮以遺骨累兄也故忍死而為是言噫嘻痛哉寓棺
佛寺今二年矣會仲兄調官西歸始得返君鳳山之原
雖川浮陸走未免乎撼頓而一勞永逸蓋將從先大夫
於九泉惟兄不友戀繆寸祿拘牽文禁既不得共載而
西又不容引紼而前寫苦言於一奠抱沉恨以終天異
英靈之未泯涉遠道以安然

餘杭祭十一妹文

紹興三十二年

吾妹姿相豐碩沉厚寡言以世法論之意其壽且福也
奈何年未三十而遽夭乎哉殽旅陳歌此奠章寄其酸
辛嗚呼哀哉尚饗

祭羅長卿文

隆興二年十二月

維隆興二年歲次甲申十二月某甲子具位周某某等謹
以清酌庶羞之奠致祭於故會昌尉長卿五丈之靈嗚
呼樸屬之車器攻才良一日出門折軸傾箱不如下澤
弗已於行有幽者蘭久含國香未韡其華乃萎於霜不

如蔓草自全其生相彼二物類吾長卿嗟乎長卿博洽
精明志行萬里名高一鄉如車斯堅如蘭斯芳試之邑
尉豈曰騫翔乃蹶乃枯誰毀誰戕昔我卜居十里相望
每到君家必羅酒漿歡呼竟夕交舉罰觥君又善戲謔
而不傷分雖朋友心則弟兄謂當華顛畢此交情豈知
今日遽哭其喪嗟乎長卿卿真亡矣古書多誤誰發明
矣近事或疑誰考評矣觀瀾風月失平章矣山房圖籍
虛暴涼矣升堂一慟涕泗滂矣嗟乎長卿情未忘否鑒

此誠否醕此觴否

祭林虞仲教授文

乾道元年六月十三日

維乾道元年歲次乙酉六月戊寅朔十三日庚寅具位
劉令猷具位周某謹重以清酌茶果之奠告於虞仲教
授同年林兄之柩嗚呼君學雖苦詞藻則敷君貌雖瘠
志氣則腴一第起家遊逝亨衢百艱隨之寸步崎嶇再
終親喪小試師儒談經一年乃與病俱臨食不盡逢觴
不斟卧榻頻仍人為君虞君獨謝醫我疾且蘇卒莫能

興豈命也夫人生夢幻百年湏臾何壽何夭何榮何枯
君則往矣傷哉其孥男齒未齠女髻未髻弔者酸辛忍
聞呱呱情義所敦況於吾徒邈焉七閩南負海隅何以
再拜瞻墓之榆何以千里撫君遺孤薄酹我酒薄奠我
芻哭送江濱目斷檣烏終天之訣已矣嗚呼伏惟尚饗

祭張德莊監丞文

維乾道二年歲次丙戌三月甲辰朔二十三日丙寅具
位周某謹遣私僕以清酌庶羞之奠致祭於故軍器監

承同年德莊張兄之靈猗與德莊敏達溫恪奮身儒林
學種文獲有拔之朝入佐帥幕翔於泮水使於大漠歸
教朱邸人歎淹泊戎監稍遷鴻漸臺閣遂止於斯理實
難度惟我鄭邦東汴西洛冠蓋之盛如越無鑄以是鄉
敬容或濶畧今如星辰反愧土著惟我與君是用歎愕
思矯其弊忘此懦弱同年之好同朝之樂朝夕游從日
月博約自我不見歲再更齋計來失聲膺為之搏我楚
君吳星分壤各矧復抱病淹留訪藥曾不弔孤曾不扶

柳曾不遣使片詞是託生也相厚死其何薄誠非效尤亦祇愧怍尚鑒余衷未吐斯酌臨風孔悲涕淚俱落

祭黃世永編修文

維乾道二年歲次丙戌四月甲戌朔十七日庚寅具位周某謹遣人以清酌庶羞之奠致祭於亡友世永編修學士之靈嗚呼世永始子之蹶於讒蹇於位也吾謂子畸於人而已耳非天意也及夫歸弗逮於故鄉年弗登於強仕抱修能與矯節迄不使之一試是造物之子困

非人力能軒輊矣雖然吾猶疑焉富之以問學昌之以詞藝發之以剛明行之以精銳紛百出以皆長美何美之不備曰天不相豈如是也亦既相之曷又棄之非惟棄之而又斃之矣天耶人耶誰怨誰懟寓詞千里為子慟哭流涕而已矣伏惟尚饗

祭宗人子婦李氏文

維乾道四年歲次戊子十二月戊子朔九日丙申具位周某謹以清酌素饌之奠致祭於宗人武翼子婦李氏

昔夫人遐道而沒我先人實貳茲邦惟宗婦之故為旅
殯於僧舍今踰四十年而夫人之家莫有至者茲用卜
其宅兆依我先壠豈惟使夫人體魄有歸亦所以成先
祖惇叙宗姓之遺意夫人其安之尚饗

祭察推劉辰告母歐陽氏文

乾道六年正月三十日

嫁而從夫仕顯家肥老而從子祿養不違謂當百年錫
服副禕身亡子天同以喪歸昔者榮樂人今歔歔矧託
至契熟聞清徽酌觴再拜言隨涕揮

祭劉告令猷文

乾道六年

嗚呼往貢於鄉四人獲升惟我與子科齊齒朋子賢我
愚我否子能敢辱交遊契好是憑二十年間義均股肱
我隱青原子官武陵三歲不見尺書數膳我方倦飛退
避繳矰期子奮發萬里鯢鵬云何中道而失騫騰惟子
之孝鄉閭所稱病而哭母喪豈能勝遂以毀卒噫誰子
憎銘旌來歸我悲填膺望子之堂胡寧忍登尚卷疇昔
舉我有蒸

祭外舅王察院文

維乾道六年歲次庚寅閏五月庚辰朔二十六日乙巳
壻具位周某謹以清酌庶羞之奠敢昭告於外舅提刑
察院王公之塋嗚呼公有通經博古之學而不盡施於
事業有撥繁濟劇之才而不盡見於施為官雖遷而人
猶悼其屈年雖高而志未向乎衰此中外所共悉非親
黨得而私也惟鄙不肖為公所知二十年間有合有離
往聞公抱病溪之上蓋嘗冒彭蠡之險涉長江之危曾

是四旬之緩悽然隔世之悲雖徘徊之累月迄差池於
葬期念佳城之一閉修芳歲之三馳粵自江而徂浙忘
雨沐而風吹逮弭權於故居懷握手於平時何英姿之
凜凜乃封土之纍纍跪陳詞而薦酒莽無言而寄思嗚
呼哀哉尚饗

祭汪養原待制文

維乾道七年歲次辛卯正月丙子朔十六日辛卯具位
周某謹遣人以清酌庶羞之奠致祭於故敷文閣待制

汪公之塋嗚呼人孰無才考德或非位孰不顯得君者
稀嗟惟我公充實光輝往在宮庭言無脂韋厥初漸遷
久始登畿上一見之決付政機升之諫省試之禁扉正
論攸興繫公是依民之無祿公則病歸遺書繼聞皇心
歔歔惟愚不肖世所訶譏公獨何取乃與衆違章江十
日論析精微我舟既發公蓋猶飛飛倘知永訣別泪忍揮
念言及茲痛聲屢噫人生幾何朝露易晞惟有賢子不
朽庶幾天報可必豈待禱祈遥陳奠觴已矣音徽嗚呼

哀哉尚饗

祭趙溫叔雄舍人母楊令人文

乾道八年二月

嗟嗟夫人行為女師三遷之教允義且慈帝謂子賢母其可知錫之令名象服是宜母來蜀道子返朔陸粲然金章迎拜達都都人聚觀羨慕嗟咨子且廊廟母當期頗有斑萊衣忽焉齊衰有華蘭陔宛其素帷榮悴難謀旁觀涕洟矧鄙不肖託契於茲升堂而拜謂且不遲孰云夫人而遽止斯走弔令子心焉孔悲

祭胡季懷文

乾道八年七月

惟君學窺古人氣蓋一世屏遠紛華耽悅文藝南宮屢
上壯志彌銳謂都卿相何有科第中道而天命也胡戾
萬生擾擾誰則不逝之子之才期在經濟而止於斯為
善何勵念昔識君實偕秋計相從二紀浹洽儔儷時中
之堂日或重詣尋繹典籍考評興替休以棋酒雜以卜
筮隔晨不覲已駭奴隸如何分手曾未閱歲計來千里
拭面反袂今我言歸君既祥祭顧瞻舊遊悼念交契心

馬孰論駕馬孰稅孰陪笑謔孰解愚蔽惻然百懷寄此
一醖幽幽總惟髣髴來齊失聲大慟老淚盈眦

祭芮國器祭酒文

維乾道八年歲次壬辰十二月乙未朔九日癸卯具位
周某謹遣人以清酌庶羞致祭於故右文殿修撰芮公
之靈惟公之德渾厚正直惟公之才恢闔俊軼克孝且
友其秉也天勇於蹈義則由學然發為詞章登唐近漢
著於議論弗詘弗諂士有險夷道無磷緇從容周行譽

問孔歸君子所恃而亦不比小人所畏而亦不忌帝庸
深知決用靡疑云誰不仁遽殲奪之太學千英毀譽雜
出聞公之喪隕涕如一況我鄙介交分尤深初為王官
同事司成遷正麟閣我猥公先傳刀之夢暮年輒驗執
筆太史分察南臺凡我所歷公必繼來我之投閒僻在
螺水公使嶺表過我蕭寺公徒金節我起持麾不會於
閩而遇於畿公長國子我塵少令官曹俱清班綴愈近
湖山擇勝尊酒論文如何俯仰其迹俱陳殄瘁之悲曰

惟衆共死生契闊其如予慟蒼黃去國莫莫生芻有概
於中身楚心吳夢為斯文以酹靈几寤而驚叱纔記三
四昔焉氣合今固神交公惟不忘忍吐斯殽

祭靖州太守李發文

維淳熙元年十二月日具位周某謹以清酌家蔬之奠
致祭於知府李公之靈噫公之學博貫今昔噫公之才
善理繁劇雖更五郡用則未極雖越中壽年胡不百有
丹其旒爰即窀穸酌於道周寄此心惻嗚呼哀哉

祭洪景嚴樞密文

維淳熙二年歲次乙未二月癸丑朔十八日壬申朝請
郎充右文殿修撰提舉江州太平興國宮周某謹遣人
以清酌庶羞之奠致祭於故大資政樞密鄱陽公之靈
嗚呼天生雋才於德或靳公優班馬而望顏閔士有其
資罕或逢時公際勲華而為臯夔曠幾百年鍾是全美
宜享黃髮卒相天子何成之艱而往也遄膏澤在人疇
不潜然矧伊不肖嘗綴賓客試於玉堂公實發策哲人

云亡倍蓰其悲物雖薄矣誠則庶幾嗚呼哀哉尚饗

祭汪聖錫尚書文

維淳熙三年歲次丙申二月丁丑朔具位周某謹以清酌庶羞之奠致祭於故端明學士尚書汪公之靈嗚呼景德祥符之際嘉祐治平之前紛羣才之卓犖瑞聖世之聯翩皆學優於少壯而名重於回旋人望之而莫敢輕國恃之而無所愆迄鞏固於丕基豈不賴夫儒先逮南渡之中興嘉此風之浸還雖議論其或殊咸望道而

勉旃公纔隣於弱冠已接武於英躔惟聞一而知十故人百而已千學日成而名日尊志彌勵而操彌堅宜受知於兩朝更六卿與十連謂主盟於斯文遂幹旋於化甄倏淪亡於砥柱空嗟咨於逝川嗚呼哀哉天之生公謂無意耶何逢時之早而降才之全謂有意耶何初若成就而終於棄捐莽彼蒼之難問徒傷心而涕漣公既深知我之愚我豈不知公之賢蓋經世之慮至遠抑愛君之心甚專汲汲乎惟恐一士之或遺孜孜乎惟憂正

論之或偏為善急於饑渴排奸甚於鷹鷂寧見嫉乎斯
世終守道而不遷人之知經攻傳註者遺意義公則越
衆說之拘攣人之觀史究成敗者略同異公則兼二者
而磨研在朝廷則居今而行古臨征鎮則守經而與權
暨食於家益全其天舉嗜好以咸無惟羣書之貫穿凡
本朝人物議論之邪正暨歷代禮樂政刑之革沿紛紜
如百氏之異學叢脞如故家之遺篇無一事之不考無
一書之不傳位已躋於二品居未謀於隻椽豈常情之

能測度而世利之所拘牽縱弗登於耄期寧不及於華
顛奚精明之未減乃遇疾而沉綿雖間親於藥石猶日舒
於簡編甫占書以貽我俄隱几而終焉觀學力之如斯
信古人之與肩嗚呼哀哉自公之退也有毀有譽而是
非則可考矣及公之歿也無愛無憎而莫不為之悽然
乃知公論固已定於今日所謂好惡亦可待夫百年寄
悲悰於一奠耿千慮而莫宣嗚呼哀哉

經筵同僚祭范西叔仲苞侍講文

程侍郎大昌
程少卿叔達

蕭舍
人燧

維淳熙三年歲次丙申十一月壬寅朔十九日庚申朝
散大夫試尚書兵部侍郎兼侍讀兼直學士院兼太子
詹事管城縣開國男食邑三百戶賜紫金魚袋周某等
謹以清酌庶羞之奠致祭於故侍講諫議范公之靈恭
惟本朝世納諫諍有若范氏直臣相望在仁祖時忠文
著節熙寧盛際榮國有間暨太史公顯於元祐清規直
道宏議正辭紀於信書播在衆口三宗致治三賢與焉

中間寂寥既八十載源深流洄公興酌之萬里來朝結
知真主烏堂騎省言聽諫行風采凜然聲徽籍甚得時
與位綽有祖風惟祿及年云胡不逮上心震悼朝論嗟
咨某等並侍經幃幸聯僚契間講禹貢服公淹該音吐
琅然今猶在耳豈期踰月遽哭喪舟酒肴雖微情則無
已嗚呼哀哉

宮僚祭楊信伯恂工部文

程少卿叔達 林祭
酒光朝 蕭左史燧

維淳熙三年歲次丙申十二月壬申朔十日辛巳朝散

大夫試尚書兵部侍郎兼侍讀兼直學士院兼太子詹
事周某等謹專人以清酌庶羞之奠致祭於故提舉工
部信伯楊公之靈嗚呼信伯有高明之資有淵源之學
有正大之論有精白之心其事公卿敬而不諂其待文
友誠而不苟抱能若斯從政何有乃者倦游中秘思試
外庸而四牡未馳遽先朝露一區方卜已閉夜臺人皆
傷心公固齎志某等或嘗僚太史或共事承華念別日
之幾何悵終天之已矣一酹遥致九原倘聞嗚呼哀哉

祭劉汝一度諫議文

維淳熙五年歲次戊戌二月丙寅朔十日乙亥具位周
某謹遣人以清酌庶羞之奠致祭於故諫議殿撰劉公
之靈惟公學博而醇氣和而剛文掩衆俊行高一鄉石
林之葉龍溪之汪謂公晁董交飛薦章迨其仕矣或抑
或揚晚登諫垣聲譽孔彰飛龍在天進佩水蒼主聖臣
直疏盈皂囊雖分左符宸眷未忘論譔之華儒林以光
於漳於婺蘇枯弱強上欲用公公足弗良八秩甫開奄

兮淪亡位非不顯年非不長有蘊莫施寧隱且殤士夫
太息我涕用滂念昔瀛洲分校鉛黃直則並舍歸則連
牆今焉百里莫奠公喪無窮之恨寓此一觴嗚呼哀哉

祭莫子齊舍人文

維淳熙五年歲次戊戌十二月庚寅朔四日癸巳翰林
學士中奉大夫知制誥兼侍讀兼太子詹事兼修國史
管城縣開國子食邑五百戶賜紫金魚袋周某等謹以
清酌庶羞之奠敢告於故直院中書舍人莫公之靈惟

公行飭文敏內剛外和名重月評秀發儒科入為王官
退食委蛇恂恂寡言鮮或譏訶見義則為勇敵橫戈介
卿列監禁掖鑾坡再至三至人歎蹉跎乃心怡然守道
無頗往裨王藩譽問孔多於溫於泉中和可歌召登從
班進賢我我匱薄之故嬰此微疴賜告於家禮殊紫荷
禹中草制文尚傾河甫息在牀遽隨逝波縉紳駭聞爭
以為訛謂仁必壽豈知其他矧伊雙鬢亦云未瞠奄忽
如斯天理則那吾徒為僚方賴切磋脯醢之真胡為駢

羅爵觴再拜有淚滂沱嗚呼哀哉

祭婁寬夫文

維淳熙六年歲次己亥六月戊子朔十三日庚子具位
周某謹以清酌家蔬之奠致祭於故寬夫知縣婁公之
靈嗚呼寬夫心莊而貌舒行飭而才敷自策名於乙科
即結綬於中都屬製錦以來歸槩身章之銀朱期壽祿
之方昌胡暴疾而弗蘇庭有耄老之親室存幼稚之孤
謂作善其降祥嗟至此兮何辜紛太息於路人矧綢繆

於鄉閭寄郊關之一酌悵悲懷之莫攄嗚呼哀哉尚饗

同年祭何誠甫司業文

淳熙六年七月三日

維年月日具位周某某等謹以清酌蔬食之奠致祭於故
司業何公誠甫年兄之靈嗚呼士之毀譽莫嚴於月旦
之評莫切於師儒之職况永嘉夙號士鄉而太學又公
論所自出耶今公由少至老一邦之人推為君子長者
及官成均士皆心悅誠服初未嘗峻規矩厲聲色也行
已立朝譽望如此則其學問之富涵養之厚豈易測哉

然而位纔止於六品不可謂之滿能壽僅踰於耳順不可謂之稱德此縉紳鄉閭所以齎咨涕洟為國惜賢而不能自釋也況吾徒託同年同朝之契相與款密者乎真觴雖微情則何極嗚呼哀哉

同年祭李子茂木舍人文

陳兵部庸民表
杜左司閹侍郎蒼舒

陳戶部
居仁

維淳熙六年歲次己亥十二月甲申朔十八日辛丑具位周某等謹以清酌齋蔬之奠致祭於故右史中書舍

人同年子茂李公之靈嗚呼惟公學通今古名重鄉黨
言游膠庠間見日廣其詞可宗其行可仰事於王朝宜
矣天獎蘭臺粉闥方振逸響螭階夾侍鸛閣參掌日朝
未央衣振容爽甲午之晨天門誅蕩同僚顧言左史安
往或云逝矣衆色惘惘曰未嘗疾斯言豈誑走問其家
嘻已屬續藥不及施語不及兩斯湏之間遂隔幽壤賓
朋哭弔相視惘恍矧知吾徒叨綴虎榜夙承清規忍覩
遺像聊陳豆觴敬叙疇曩嗚呼哀哉

祭張敬夫殿撰文

維淳熙七年歲次庚子三月癸丑朔十九日辛未具位
周某謹遣人以清酌庶羞之奠致祭故右文殿修撰南
軒張兄之靈嗚呼天生蒸民受中惟一或哲或愚則係
其習嗟吾敬夫氣稟剛直能擴而充又學之力發揮伊
洛排斥老釋有德有言後來所式平生忠孝如嗜飲食
其遠佞邪則猶鬼蜮念昔先正心在王室恢圖之功曷
敢不力根本如固折衝可必天子是嘉選鎮南國訓兵

劬農他則遑恤孰云盛年而抱沉疾易箒之際爽靈不
惑遺疏惓惓孔明是匹伸紙疾書遂以絕筆朝之忠良
士之準的今也兩亡孰不心惻矧伊無似夙賴三益莫
視絞衾莫相窵窳遙致奠觴悲來填臆嗚呼哀哉尚饗

祭從母王碩人文

維淳熙七年歲次庚子九月庚戌朔九日戊午甥具位
周某謹遣保義郎充本府主管進奉劉晟以清酌蔬食
之奠致祭於從母太碩人王氏之靈嗚呼外王父息女

有歸者六人太碩人其孟也諸季不幸往往蚤世久者
已五六十一年近亦三四十一年矣惟太碩人富貴壽考歸
然獨存有德有年有子有孫歲瀕九十乃以疾逝五福
具備可謂盛哉某以瑩然孤甥夙荷憐撫不侍顏色於
今九年念外家之日微傷永感之歲久間訃痛絕不知
哀涕之橫流也屬有列於朝無由拊棺一慟遙致奠酌
肝心為摧嗚呼哀哉

祭呂伯恭禮部文

維淳熙八年歲次辛丑九月甲戌朔二十五日戊戌通
奉大夫參知政事周某謹遣人以清酌庶羞之奠致祭
於亡友明道直閣禮部伯恭呂君之靈嗚呼伯恭河嶽
之英公卿之裔躬蹈五常心潛六藝學富而醇文敏而
麗通今不流博古不泥高明之識力去其蔽卓絕之行
亦矜其細他人有一自足名世惟君兼之夫孰能儷蟬
聯簪紱芥拾科第堂堂申公謂且克繼皇心是嘉召寘
班綴成均博約館閣榮滯南宮表章史觀凡例主盟斯

文每食忘齎風淫末疾乘厥勞勩歸哉毫祠可以自憇
鑽堅仰高講習彌勵曾不息黥曾不補劓竟隕其生壽
夭誰制萬斛之舟江海期濟觸石而傾未遑鼓枻千年
之木棟梁可計遇風而摧乃萎薪桂才也何多命也何
戾生徒滿門相向雪涕縉紳諸儒咸惜其逝矧伊鄙夫
辱在交契姓不同耳心則魯衛易簣莫親臨穴奠祭寄
辭西風揮此哀涕嗚呼哀哉

祭芮國瑞尚書文

維淳熙九年歲次壬寅六月庚子朔二十二日辛酉通
奉大夫參知政事周某謹遣承節郎幹辦府張佐以清
酌蔬食之奠致祭於故侍讀國史尚書芮公之靈嗚呼
惟公才學兼優弟兄競爽聲振膠庠評高鄉黨伯也先
逝公譽日廣徧持使節明燭幽枉晚踐禁塗殫竭忠讜
乃心王事浸失頤養方聞予告而遽長往遺占入奏語
闕嗟惻賻禮有加眷知可想言念孤蹤託闕疇曩累日不
見遂隔黃壤寄情奠觴揮淚泚頽嗚呼哀哉

祭外祖王給事家諸塋

維淳熙十年歲次癸卯十月壬辰朔外甥具位周某謹
遣使臣李椿以清酌庶羞之奠敬祭於外祖給事待制
贈少保王公外祖母衛國夫人宋氏亡舅通判二十八
大夫亡衿宜人韓氏之塋恭惟外氏昔為大家今茲丘
壠近在陽羨而祚嗣湮替宿草弗除某繫官於朝末由
拜掃孟冬之朔俗重祭墓遙伸酌奠不勝凱風寒泉之
思

祭陳應求俊卿丞相文

維淳熙十四年十二月戊辰朔具位周某謹以清酌庶羞之奠致祭於故太保大觀文魏國正獻陳公之靈惟公德業純備哀榮終始譽滿四海行書太史獨餘易名疇敢溢美矧公好謙遺戒毋誅上實命之厥有深旨於皇本朝賢輔接踵為正若獻三人而已往在慶歷祁公宅揆忠清諒直廉頑仁鄙用雖曰淺名則千祀元祐之初政歸呂氏絜國紀綱養士廉耻公卿景從夷夏風靡

後暨清源羽翼端即迨其入相有譽無毀生全寵光沒
厚恩紀自是厥後鮮矣斯比堂堂魏公聲望崛起如杜
如呂佐我天子甘盤舊學視何有煒知臣者君人以倫
擬借曰形容辭之贅矣言念晚生叨附雋軌大明初升
詞掖乏使當代匠斲汗顏血指二十六年言猶在耳期
公壽考與宋闕武孰云微疾遂隔生死殄瘁之悲豈為
知己情馳一觴目斷千里嗚呼哀哉

祭袁州兄嫂文

維淳熙十六年歲次己酉十月己亥朔十六日甲寅具
位弟周某謹以清酌庶羞之奠致祭於大兄袁州太守
大嫂安人王氏之塋惟兄仁心義概秉彝於天又濟之
以家傳處則孝弟恭肅為州閭之楷式出則公勤廉敏
而於國事尤拳拳焉故縉紳朋舊罔不稱其德塗巷小
夫亦能知其賢茲固公論有不可掩而非兄弟之私言
也自邑而倅而守人方期於九遷而不肖之弟叨備二
府遂決意於林泉識與不識皆曰外當付以使節入當

陪於邇聯某既惜已而忘內舉之誼彼侍從近臣雖誦
言其可薦亦未免指某以為嫌使兄有撥繁治劇之才
而不獲展有致君澤民之志而不及宣嗟天命之難謀
復嗇壽於百年急難之義告歸宜遄愧屢請之弗俞歷
七載而遷延逮奉祀於故里始展墓於新阡區區本志
夫豈其然蓋將晚歲芒鞋竹杖從兄於青原白露之上
乃今觴酒豆肉哭兄於荒煙野草之間是宜肝心之糜
潰何止泣涕之漣漣而已嗚呼哀哉

祭繹姪文

維淳熙十六年歲次己酉十月丁亥朔十六日壬寅叔
具位以清酌庶羞之奠祭於亡姪小一郎及婦胡氏之
塋吾姪事親孝謹行已恭敬輔以問學宜貴與永顧乃
名不登於仕籍年弗逮於知命雖天理之難推亦吾門
之不幸屬續之際遺書來諭痛親養而託孤知中心之
炯炯何斯人而斯疾重予懷之耿耿逮得請而來歸已
嚴霜之七隕酌一觴以忘言紛填胸之悲憤嗚呼哀哉

祭呂帳幹文

維紹熙元年歲次庚戌三月乙卯朔二十四日戊寅具
位周某謹遣使臣文立方以清酌庶羞之奠致祭於娣夫
帳幹文林呂公之塋某去秋歸自浙西亟欲躬走墓道
非間於風雨則有疾病因循累月未能遂區區之志洎
辰代禮尚其鑒享

祭叔母李氏孺人文

紹熙元年歲次庚戌三月乙卯朔二十四日戊寅姪具

位周某謹遣使臣文立方以清酌庶羞之奠致祭於叔母孺人李氏之塋某去秋歸自浙西亟欲躬走墓道而非間於風雨則有疾病因循累月未能遂區區之志今夏序將臨大懼以稽緩獲罪於幽涓辰代禮良非得已仰惟淑靈俯賜鑒享

祭蔣參議文

維紹熙三年歲次壬子三月甲戌朔十二日乙酉具位周某謹以清酌庶羞之奠致祭於故參議朝奉蔣君之

靈惟君廉勤愿慤莊重坦夷上介之除我與聞之來分
藩符君已之幕耄雖將及見為矍鑠孰云歲徂君年與
周識者嗟悼況於同僚翩翩者旌遙指鄞水目送歸艎
一觴永已

文忠集卷三十八